



KARATE SAVEZ KANTONA SARAJEVO

**DISCIPLINSKI
PRAVILNIK KARATE SAVEZA KANTONA SARAJEVO**

Sarajevo, januar 2010.

PRIJEDLOG DISCIPLINSKOG PRAVILNIKA KARATE SAVEZA KANTONA SARAJEVO

I OPŠTE ODREDBE

Član 1.

Ovim pravilnikom regulišu se disciplinski prekršaji, vaspitne i disciplinske mjere, lica koja ih mogu počinuti, lica na koja se mjere mogu primjeniti, postupak utvrđivanja učinjenog prekršaja, postupak i procedura utvrđivanja disciplinske odgovornosti i izricanje mjere, te žalbeni postupak.

Član 2.

Niko ne može biti kažnjen za prekršaj, prije nego što je učinjeno, nije bilo pravilnikom određeno kao prekršaj i za koje pravilnikom nije bilo propisano kako će se kazniti onaj ko ga učini.

Član 3.

Svrha prekršajnog kažnjavanja jeste:

- Sprječavanje društveno štetnih djelatnosti,
- Sprječavanje učinioca da ne čini prekršaje i njegovo prevaspitavanje,
- Vaspitan uticaj na druge da ne čine prekršaj,
- Uticaj na razvijanje sportskog i društvenog morala te discipline članova Karate saveza Kantona Sarajevo BiH

Član 4.

Prema odredbama ovog Pravilnika a za učinjen disciplinski prekršaj, odgovara: takmičar, sudija, ispitivač - instruktor, treneri, funkcioneri saveza i organa Karate saveza KS koji je počinjen na teritoriji Kantona Sarajevo.

Disciplinskoj odgovornosti obzirom na svojstva iz prethodnog stava ne odgovaraju lica koja u vrijeme izvršenja prekršaja nisu imala navršenih 14 godina života.

Član 5.

Disciplinski prekršaj je društveno štetno djelo čija su obilježja određena ovim Pravilnikom, pa se obzirom na intezitet povrede zaštitnog dobra dijele na teže i lakše disciplinske prekršaje.

Nije prekršaj ono djelo koje iako zadrži obilježja prekršaja određena ovim Pravilnikom, kada predstavlja neznatnu društvenu opasnost zbog malog značaja i zbog neznatnosti ili odsutnosti štetnih posljedica.

Član 6.

Krivična odgovornost, odnosno odgovornost za privredni prijestup ili za prekršaj neisključuje odgovornost za povredu utvrđenu ovim Pravilnikom.

Član 7.

Učinitelj prekršaja je odgovoran samo kada je djelo učinio sa umišljajem ili iz nehata. Prekršaj je učinjen sa umišljajem kada je učinitelj bio svjestan svoga djela i htio njegovo izvršenje ili kada je bio svjestan da usljed njegovog činjenja ili nečinjenja može nastupiti zabranjena posljedica pa je pristao na njeno nastupanje.

Prekršaj je učinjen iz nehata kada je učinitelj bio svjestan da zabranjena posljedica može nastupiti ali je olako držao da ona neće nastupiti ili da će je moći otkloniti, ili kada nije bio svjestan mogućnosti nastupanja zabranjene posljedice i ako je prema okolnostima i svojim ličnim svojstvima bio dužan i mogao biti svjestan te mogućnosti.

Član 8.

Nije disciplinski odgovorno lice koji u vrijeme izvršenja prekršaja nije bilo svjesno nekog njegovog zakonom određenog obilježja, ili koje je pogrešno uzelo da postoje okolnosti prema kojima bi kada bi ove stvari postojale to djelo bilo dozvoljeno.

Član 9.

Disciplinska komisija može blaže kazniti učinioca prekršaja koji iz opravdanih razloga nije znao da je takvo djelo zabranjeno, a može ga i osloboditi od kazne.

Član 10.

Disciplinski prekršaj može biti izvršen činjenjem ili nečinjenjem.

Disciplinski prekršaj je izvršen nečinjenjem ako je učinitelj propustio da izvrši radnju koju je bio dužan izvršiti.

Član 11.

Disciplinski prekršaj je izvršen u vrijeme kada je učinitelj radio ili je bio dužan da radi, bez obzira kada je posljedica nastupila.

Član 12.

Disciplinski prekršaj je izvršen kako u mjestu gdje je učinitelj radio ili bio dužan da radi tako i u mjestu gdje je nastupila posljedica.

Član 13.

Ko drugog sa umišljajem podstakne da učini disciplinski prekršaj kaznit će se kao da ga je sam učinio.

Član 14.

Ko drugog sa umišljajem pomogne u izvršenju disciplinskog prekršaja kaznit će se kao da ga je sam učinio, a može se i blaže kazniti.

Kao pomaganje smatra se naročito davanje savjeta ili uputstava kako da se izvrši disciplinski prekršaj, stavljanje na raspolaganje učiniocu sredstava za izvršenje disciplinskog prekršaja, uklanjanje prepreka za izvršenje disciplinskog prekršaja, unaprijed obećano prikrivanje disciplinskog prekršaja ili učinioca.

Član 15.

Podstakač i pomagač također su disciplinski odgovorni.

II DISCIPLINSKI PREKRŠAJI

Član 16.

POD TEŽIM DISCIPLINSKIM PREKRŠAJEM PODRAZUMJEVA SE:

- namjerno i svjesno kršenje opštih akata Karate saveza Kantona Sarajevo, kao i akata KS BiH
- onemogućavanje ili ometanje rada i odlučivanja organa Karate saveza Kantona Sarajevo,
- javno iznošenje neistina o radu Karate saveza Kantona Sarajevo,
- kada selektor nepoštuje kriterije za izbor reprezentacije Karate saveza Kantona Sarajevo
- onemogućavanje razvoja karate sporta, reprezentacije BiH, prezentacije Karate saveza Kantona Sarajevo u Evropi i svijetu,
- svjesno uticanje Člana organa karate organizacija da se donese odluka koja su u suprotnosti sa opštim aktima Karate saveza Kantona Sarajevo.
- narušavanje principa udruživanja, prava i obaveza udruženih organizacija Karate saveza Kantona Sarajevo
- onemogućavanje unapređenja borilačko-odbrambene sposobnosti građanina,
- omogućavanje usklađenog razvoja i djelovanja udruženih karate organizacija na masovnom širenju karate sporta i povezivanje karate sporta sa potrebama sistema odbrane,
- djelatnost izvan okvira nadležnih organa Karate saveza Kantona Sarajevo, a koja se obavlja protivno odlukama ovih organa,
- onemogućavanje ravnomjernog rada i razvoja svih rekreativnih i drugih selekcija,
- udruživanja kantonalnih karate saveza, ili druge karate organizacije, takmičara, instruktora, ispitivača i trenera karate organizacije izvan Karate saveza Kantona Sarajevo bez saglasnosti nadležnih organa KS BiH i Karate saveza Kantona Sarajevo.
- zloupotreba amblema, znaka i značke Karate saveza Kantona Sarajevo,
- svaka povreda amaterizma protivna odredbama usvojenih opštih akata Karate saveza

Kantona Sarajevo, KS BiH, Sportskog saveza i Olimpijskog komiteta BiH,

- nesprovođenje ciljeva i zadataka Karate saveza Kantona Sarajevo utvrđenih statutom i opštim aktima Karate saveza Kantona Sarajevo,
- iniciranje ili organizovanje nastupanja kluba na međunarodnim karate takmičenjima ili bilo koja druga međunarodna saradnja (aktivnost), a da predhodno nije dobijena saglasnost KS BiH ili Karate saveza Kantona Sarajevo,
- neopravdano onemogućavanje nastupa takmičara u reprezentaciji BiH, reprezentaciji Karate saveza Kantona Sarajevo,

Član 17.

POD LAKŠIM DISCIPLINSKIM PREKRŠAJEM PODRAZUMJEVA SE:

- povreda načela javnosti rada Karate saveza Kantona Sarajevo,
- nepružanje saradnje selektoru reprezentacije Karate saveza Kantona Sarajevo i selektoru KS BiH
- neodazivanje sportiste na poziv selektora reprezentacije,
- nepridržavanje odredaba Poslovnika o radu Karate saveza Kantona Sarajevo, Poslovnika o radu Upravnog odbora Karate saveza Kantona Sarajevo,
- nesprovođenje takmičenja koja su utvrđena programom Karate saveza Kantona Sarajevo,
- omogućavanje takmičenja licima koja prema propozicijama, opštim aktima ili odlukama organa KS BiH i Karate saveza Kantona Sarajevo nemaju pravo učešća,
- otkazivanje prihvaćene organizacije takmičenja u roku kraćem od trideset dana,
- neispunjavanje propisanih uslova organizacije takmičenja utvrđene zahtjevom takmičarske komisije,
- propuštanje organizatora da na vrijeme obavjeste učesnike takmičenja o mjestu, vremenu i uslovima takmičenja,
- neopravdano nastupanje prijavljenog takmičara,
- neopravdano napuštanje takmičenja,
- propuštanje organizatora da se pridržava utvrđenih i propisanih uslova takmičenja,
- nastupanje na takmičenju sa neispravnom i bez takmičarske knjižice,
- nastupanje na takmičenju takmičara bez ljekarskog pregleda i potvrde o osiguranju života
- prijava takmičara u nepripadajuću starosnu dob ili težinskoj kategoriji,
- nevođenje propisane dokumentacije na takmičenju,
- nesportsko ponašanje stručnog rukovodstva, takmičara, vođe ekipe i drugih službenih lica,
- ometanje rada službenih lica od strane učesnika takmičenja,
- prouzrokovanje prekida takmičenja,
- neispunjenje ili neblagovremeno ispunjavanje finansijskih obaveza prema Karate savezu Kantona Sarajevo,
- propuštanje delegata Karate saveza Kantona Sarajevo da na takmičenju preduzme mjere u cilju obezbjeđenja uslova za normalno održavanje takmičenja omogućiti pravilnu isplatu predviđenih obaveza, ne podnošenje izvještaja sa takmičenja u roku od 7 dana ili ne obezbjedi pravilnu primjenu propozicija i drugih opštih akata Karate saveza Kantona Sarajevo,
- tehničar koji u toku borbe svjesno nanese povredu protivniku ili se nesportski ponaša pa usljed toga bude diskvalifikovan od strane sudije,
- ovlašteno lice koje na takmičenju omogućiti da sudi lice koje se ne nalazi na listi sudija KS BiH ili Karate saveza Kantona Sarajevo ili nije delegirano kao sudija za to takmičenje ili

- nezadovoljava druge uslove za suđenje,
- sudija koji propusti da se odazove ili pak u propisanom roku ne otkaže učešće na takmičenju za koji je delegiran kao sudija,
 - sudija koji u vršenju sudijske funkcije u vrijeme takmičenja učini svjesnu povredu materijalnih pravila suđenja,
 - sudija koji se na takmičenju ponaša na način kojim narušava ugled karate sporta,
 - trener koji svojim nedoličnim ponašanjem podstiče takmičare na nesportsko ponašanje,
 - ispitivač za zvanja koji održi polaganje bez saglasnosti nadležne komisije, trener - takmičari i ispitivači koji održe ispit za zvanja a da nemaju vazeću licencu,
 - organi Karate saveza Kantona Sarajevo, Članovi tih organa i druga odgovorna lica koja propuste da predu-zmu mjere na sprječavanju činjenja disciplinskih prekršaja ili po saznanju lica i izvršenog disciplinskog prekršaja propusti podnijeti prijavu disciplinskoj komisiji,
 - organi Karate saveza Kantona Sarajevo koji ne provode zadatke iz djelokruga svoga rada,

III DISCIPLINSKE MJERE

Član 18.

Učiniocima disciplinskog prekršaja mogu se izreći ove kazne:

1. Opomena,
2. Ukor,
3. Posljednja opomena,
4. Novčana kazna,
5. Zabrana nastupanja,
6. Zabrana organizovanja takmičenja,
7. Zabrana vršenja funkcije,
8. Zabrana nastupanja na svim stepenima takmičenja.

Član 19.

Disciplinski organi mogu na osnovu odredbi ovog Pravilnika, prema svim prekršiocima iz Člana i ovog Pravilnika, izreći sljedeće vaspitne mjere,

1. Opomenu,
2. Ukor,
3. Posljednju opomenu.

Posljednja opomena kao vaspitna mjera nije uslovljena prethodnim postojanjem drugih vaspitnih mjera.

Član 20.

Disciplinski organi Karate saveza Kantona Sarajevo mogu izreći, na osnovu odredbi ovog Pravilnika, sljedeće disciplinske mjere:

ZA LAKŠE DISCIPLINSKE PREKRŠAJE

a) Prema takmičaru:

- novčana kazna u iznosu od 100 - 300 KM,
- zabrana nastupanja do šest mjeseci.

b) Prema Članovima samoupravnih organa:

- zabrana vršenja dužnosti na kojoj je izvršio prekršaj od šest mjeseci do godinu dana.

c) Prema karate organizacijama:

- novčana disciplinska mjera u iznosu od 200 - 500 KM,
- zabrana nastupa na jednom ili dva kantonalna prvenstva,
- zabrana organizovanja takmičenja na domaćem terenu u trajanju od šest mjeseci do godinu dana.

d) Prema ispitivačima i instruktorima

- novčana kazna u iznosu od 100- 300 KM,
- zabrana vršenja funkcije ispitivača - instruktora u trajanju od šest mjeseci do godinu dana.

e) Prema trenerima:

- novčana disciplinska mjera u iznosu od 100 - 300 KM,
- zabrana vršenja trenerske funkcije i stručnog vodstva ekipe na takmičenjima od šest mjeseci do godinu dana.

ZA TEŽE DISCIPLINSKE PREKRŠAJE

a) Prema takmičaru:

- novčana kazna u iznosu od 500 - 1000 KM,
- zabrana nastupanja od jedne do dvije godine,
- zabrana nastupanja i vršenja svih funkcija u Karate savezu Kantona Sarajevo od jedne do dvije godine,
- doživotna diskvalifikacija.

b) Prema Članovima samoupravnih organa i funkcionerima

- zabrana vršenja funkcije na kojoj je učinjen prekršaj od jedne do dvije godine,
- zabrana vršenja svih funkcija u Karate savezu Kantona Sarajevo od jedne do dvije godine,
- trajna zabrana vršenja svih funkcija u KS BiH.

c) Prema karate organizacijama

- novčana disciplinska mjera u iznosu od 500 - 2000 KM,
- zabrana nastupanja na državnim prvenstvima od godinu dana do dvije godine.,
- zabrana nastupanja na svim stepenima takmičenja od godinu dana do dvije godine.,
- zabrana takmičenja i organizovanja takmičenja na svom terenu od jedne do tri godine.

d) Prema trenerima

- novčana disciplinska mjera u iznosu od 500 - 1000 KM,
- zabrana u trajanju od godinu dana do dvije godine.

e) Prema instruktorima i ispitivačima

- novčana disciplinska mjera u iznosu od 500 - 1000 KM,
- zabrana od jedne do dvije godine.

f) Prema sudijama

- novčana disciplinska mjera u iznosu od 500 - 1000 KM,
- zabrana vršenja sudijske funkcije u trajanju od godinu dana do dvije godine.

IV ODMJERAVANJE KAZNE

Član 21.

Za određeni disciplinski prekršaj disciplinska komisija će odmjeriti kaznu u granicama koji su ovim pravilnikom utvrđene, uzimajući u obzir sve okolnosti koje utiču da kazna bude veća ili manja, a naročito stepen disciplinske odgovornosti, pobude iz kojih je disciplinski prekršaj učinjen, jačinu povrede zaštitnog dobra okolnosti pod kojima je prekršaj učinjen, ranije ponašanje, lične prilike, držanje učinioca poslije učinjenog disciplinskog prekršaja.

Pri odmjeravanju novčane kazne disciplinska komisija će uzeti u obzir imovno stanje učinioca.

Član 22.

Pri odmjeravanju kazne disciplinska komisija će posebno uzeti u obzir da li je učinilac ranije disciplinski kažnjen, da li je raniji disciplinski prekršaj istovjetan, da li su oba disciplinska prekršaja učinjena iz istih pobuda i koliko je vremena proteklo od ranije disciplinske mjere ili kazne.

Član 23.

Ako je učinilac jednom radnjom učinio više disciplinskih prekršaja, ili ako je sa više radnji učinio više disciplinskih prekršaja, disciplinska komisija će predhodno utvrditi kazne za svaki disciplinski prekršaj, pa će u pogledu izricanja glavne kazne postupiti na ovaj način:

1. Ako je za neki disciplinski prekršaj u sticanju utvrdio novčanu kaznu a za drugi disciplinski prekršaj neku drugu disciplinsku mjeru, izreći će pored disciplinske mjere i novčanu kaznu,
2. Ako je za disciplinske prekršaje u sticanju utvrdio novčane kazne izreći će jednu novčanu kaznu koja ne smije preći zbir utvrđenih kazni niti najveću mjeru utvrđenu Pravilnikom.

V DISCIPLINSKI ORGANI

Član 24.

Disciplinska komisija Karate saveza Kantona Sarajevo je radno tijelo Upravnog odbora Karate saveza Kantona Sarajevo, sastoji se od predsjednika i dva člana odnosno njihovih zamjenika.

Odluku o žalbi, na odluku Disciplinske komisije Karate saveza Kantona Sarajevo donosi Upravni odbor Karate saveza Kantona Sarajevo.

Konferencija Karate saveza Kantona Sarajevo donosi Odluku u trećem stepenu samo ako je drugostepeni disciplinski organ izrekao disciplinsku mjeru doživotne diskvalifikacije odnosno brisanje iz članstva Karate saveza Kantona Sarajevo.

DISCIPLINSKI POSTUPAK

A) PRVOSTEPENI POSTUPAK

1. Pokretanje postupka

Član 25.

Disciplinski organ Karate saveza Kantona Sarajevo, pridržavajući se odredaba ovog Pravilnika, pokreću disciplinski postupak po službenoj dužnosti, na osnovu izvještaja delegata takmičenja ili drugog organa Karate saveza Kantona Sarajevo ili na osnovu zahtjeva, svakog fizičkog ili pravnog lica.

Član 26.

Po prijemu zahtjeva ili po saznanju za prekršaj Disciplinska komisija određuje stvarnu i mjesnu nadležnost. Ukoliko nije ovlašćena da donese odluku, nije nadležna za konkretni slučaj, po službenoj dužnosti predmet dostavlja stvarno i mjesno nadležnom disciplinskom ili drugom organu koji je dužan da donese odluku o dobijenom predmetu.

Član 27.

Ukoliko Disciplinska komisija nađe da nema mjesta pokretanju disciplinskog postupka po podnijetom zahtjevu za pokretanje postupka, zahtjev se odbacuje i o tome se obavještava podnosilac koji na tu odluku ima pravo žalbe Upravnom odboru Karate saveza Kantona Sarajevo u roku od osam dana od dana prijema odluke.

Zahtjev se odbacuje ako je nastupila zastarjelost, ako su navodi netačni - lažni i ako se odnosi na radnju koja ovim Pravilnikom nije predviđena kao prekršaj.

2. Suspenzija

Član 28.

Suspenziju za prekršaje učinjene na takmičenjima, u organizaciji Karate saveza Kantona Sarajevo, određuje na samom takmičenju delegat Karate saveza Kantona Sarajevo.

U slučaju težih prekršaja predviđenih ovim Pravilnikom koji se mogu pripisati organizatoru takmičenja, kantonalnom savezu i klubu ili školi karatea, sudiji, treneru, funkcioneru ili takmičaru, delegat takmičenja može isti suspendovati do konačne odluke o učinjenom prekršaju.

Po prijedlozima za suspenziju, Disciplinska komisija je dužna da donese Odluku u roku od 15 dana od dana prijema.

Žalba na odluku o suspenziji ne zadržava izvršenje ove odluke.

3. Dostavljanje zahtjeva za pokretanje postupka

Član 29.

Disciplinski postupak počinje da se vodi dostavljanjem zahtjeva za pokretanje disciplinskog postupka licu ili organizaciji protiv kojih je ovim zahtjevom predloženo pokretanje disciplinskog postupka.

Član 30.

Zahtjev za pokretanje disciplinskog postupka dostavlja licu ili organizaciji protiv koje se pokreće postupak, predsjednik Disciplinske komisije, vodeći računa da do preduzimanja sljedeće radnje u postupku protekne najmanje osam dana.

Član 31.

Lice ili organizacija protiv kojih je pokrenut postupak imaju prava i obavezu da u roku od osam dana od dana prijema zahtjeva za pokretanje postupka, dostave Disciplinskoj komisiji pismenu izjavu o navodima iz zahtjeva za pokretanje postupka.

Pouka o ovom pravu i o obavezi dostavlja se uz zahtjev za pokretanje postupka.

Član 32.

Zahtjev za pokretanje postupka sa poukom o pravu i obavezi odgovara na zahtjev dostavlja se licu ili organizaciji protiv kojih je pokrenut postupak, putem pošte sa povratnicam.

U slučaju odbijanja prijema ili u drugom slučaju kada postaji opravdana faktička nemogućnost uručjenja zahtjeva isti se ističe na oglasnoj tabli, Karate saveza Kantona Sarajevo, s tim što se po isteku roka od osam dana smatra da je dostavljanje izvršeno.

4. Utvrđivanje disciplinske odgovornosti

Član 33.

Disciplinska komisija Karate saveza Kantona Sarajevo utvrđuje disciplinsku odgovornost iz svoje nadležnosti na javnim sjednicama na osnovu navoda iz zahtjeva, pismene izjave lica ili organizacije protiv kojih se vodi postupak, izjava svjedoka, vještaka, drugih učesnika postupka, usmenih izjava lica ili predsjednika organizacija protiv kojih se vodi postupak ili njihovih punomoćnika ili zastupnika i na osnovu drugih po potrebi izvedenih dokaza, a u skladu sa Zakonom i odredbama ovog Pravilnika.

Član 34.

Mjesto, datum i vrijeme održavanja sastanaka Disciplinske komisije određuje predsjednik Disciplinske komisije.

Član 35.

Sjednicama Disciplinske komisije rukovodi predsjednik Disciplinske komisije.

Dužnost je predsjednika i članova Komisije da se staraju da se u toku razmatranja postupka na sjednici iznesu sve odlučujuće činjenice, izvedu ili dopune dokazi i da se daju razrješenja važna za odluku o odgovornosti.

Član 36.

Prije donošenja odluke Disciplinska komisija mora pribaviti pismenu izjavu lica ili organizacije protiv kojih je pokrenut postupak.

Disciplinska komisija može, kada to zahtjeva tok postupka i potrebe tačnog utvrđivanja činjeničnog stanja, na svojoj sjednici na zapisnik saslušati lice protiv kojeg se vodi postupak odnosno predstavnika organizacije protiv koje se vodi postupak ili njihovog punomoćnika odnosno zastupnika. U tom slučaju i lice koje je u zapisnik dalo izjavu potpisuje zapisnik.

Ukoliko uredno pozvano lice ne pristupi niti dostavi uredno traženu pismenu izjavu u roku određenom Članom 14. ovog Pravilnika, a svoj nedolazak ili nedostavljanje pismene izjave ne opravda u istom roku odnosno do momenta održavanja uredno zakazane sjednice Disciplinske komisije, odluka se može donijeti i bez njegove pismene ili usmeno pred Disciplinskom komisijom date izjave.

Ukoliko je prekršilac odbio da delegatu Karate saveza Kantona Sarajevo da izjavu na samom takmičenju na kome je učinjen prekršaj, Disciplinska komisija može donijeti odluku i bez pribavljanja njegove izjave.

Član 37.

Na sjednici Disciplinske komisije na kojoj se sprovodi disciplinski postupak sastavlja se zapisnik.

Zapisnik treba da sadrži: vrijeme održavanja sjednice, sastav Disciplinske komisije, označenje podnosioca zahtjeva i lica odnosno organizacije protiv kojih se vodi postupak, označenje prisutnih učesnika u postupku, bitnu sadržinu iskaza svih učesnika postupka, dokazno rješenje,

rješenje i odluke koje su u toku postupka donijete i drugo.

Zapisnik piše zapisničar po glasnom kazivanju predsjednika Disciplinske komisije.

Tekst zapisnika se ne smije brisati i prepravljati, a precrtana mjesta moraju ostati čitljivija. Ako neko odbije da potpiše zapisnik, konstatovat će se razlog odbijanja.

Zapisnik potpisuju: predsjednik i članovi Disciplinske komisije, zapisničar i prisutni učesnici postupka koji su na poziv predsjednika Disciplinske komisije na sjednici učestvovali u izvođenju dokaza.

Član 38.

Disciplinska komisija može odlučiti da se sjednica odloži kada je potrebno da se upotpuni izvođenje dokaza.

Ako Disciplinska komisija nastavi rad na novoj sjednici po istom postupku u izmjenjenom sastavu, postupak na sjednici se sprovodi čtanjem svih do tada izvedenih dokaza.

5. Izricanje mjera, donošenje, saopštavanje i dostavljanje odluke

Član 39.

Predsjednik i članovi Disciplinske komisije ravnopravno odlučuje o odgovornosti lica odnosno organizacije protiv kojih je vođen postupak.

Odluke se donose većinom glasova.

Član 40.

Ako Disciplinska komisija nađe da lice odnosno organizacija protiv kojih je vođen postupak nisu učinili prekršaj, ili da postoje okolnosti koje isključuju odgovornost ili da nema dokaza o učinjenom prekršaju, donijet će odluku kojom se ovo lice odnosno organizacija oslobađa disciplinske odgovornosti.

Član 41.

Ako Disciplinska komisija nađe da je lice odnosno organizacija, učinilo prekršaj i da je krivo za njegovo izvršenje, oglasit će odgovornim lice odnosno organizaciju protiv kojih je vođen postupak i donijeti odluku i izricanju odgovarajuće mjere.

Prema jednom prekršiocu u istom postupku može biti izrečena samo jedna odgovarajuća disciplinska odnosno vaspitna mjera.

Član 42.

Pri odmjeravanju vrste i visine disciplinske ili vaspitne mjere moraju se uzeti u obzir sve olakšavajuće i otežavajuće okolnosti, a naročito: ranije kažnjavanje, težina počinjenog prekršaja i njegove posljedice, pobude iz kojih je prekršaj počinjen, sportske, moralne i lične osobine izvršioca, kao i njegovo držanje prije i poslije izvršenja prekršaja.

Ukoliko se utvrde posebne olakšavajuće okolnosti, izvršiocu može biti izrečena disciplinska

mjera i ispod predviđenog minimuma, ali samo ista vrsta disciplinske mjere.

Član 43.

1. O odlučivanju odgovornosti i izricanju mjera prema prekršiocima sastavlja se poseban zapisnik.
2. Odluka o glavnoj stvari donosi se u obliku rješavanja.
3. U zapisnik se unosi samo dispozitiv odluke o izrečenoj mjeri.
4. Zapisnik potpisuje predsjednik, članovi Disciplinske komisije i zapisničar.

Član 44.

Rješenje Disciplinske komisije ima uvod, izreku, obrazloženje i pouku o pravnom lijeku.

U uvod se unosi: sastav Disciplinske komisije, podnosilac zahtjeva, lice odnosno organizacija protiv kojih je vođen postupak i njihovi pomoćnici i zastupnici, označenje prekršaja zbog koga je vođen postupak i dan donošenja odluke u glavnoj stvari.

Izreka sadrži odluku o oglašavanju odgovornih subjekata krivim za određeni prekršaj o izricanju disciplinske mjere ili odluku kojom se ovi subjekti oslobađaju odgovornosti.

Obrazloženje sadrži bitne elemente zahtjeva i izjave lica protiv koga je vođen postupak odnosno predstavnika organizacije protiv koje je vođen postupak, ocjenu izvedenih dokaza, utvrđeno činjenično stanje i okolnosti koje su uticale na stepen odgovornosti i visinu izrečene disciplinske mjere.

Pouka o pravnom lijeku ukazuje na subjekte koji mogu, u kojem roku i kome da izjave žalbu na izrečenu odluku.

Rješenje potpisuje predsjednik Disciplinske komisije.

Član 45.

Ovjereni prepis rješenja Disciplinske komisije dostavlja se putem pošte sa povratnicom:

1. Podnosiocu zahtjeva
2. Licu odnosno organizaciji protiv kojih je vođen postupak
3. Kantonalnom savezu, klubu ili školi karatea čiji je prekršioc član

Član 46.

Disciplinska komisija sve svoje odluke unosi u disciplinski registar. Svaka konačna odluka kojim je izrečena, prema takmičaru, ispitivaču – instruktoru ili sudiji, disciplinska ili vaspitna mjera unosi se u takmičarsku odnosno knjižicu ispitivača – instruktora, trenera, odnosno sudije. Odluka Disciplinske komisije može se objaviti i u sredstvima javnog informisanja.

B) POSTUPAK PO ŽALBI (DRUGOSTEPENI)

Član 47.

Protiv odluke Disciplinske komisije Karate saveza Kantona Sarajevo mogu, u roku od osam dana od dana prijema rješenja, izjaviti žalbu Upravnom odboru Karate saveza Kantona Sarajevo podnosilac zahtjeva i lice odnosno organizacija protiv kojih je vođen postupak.

Žalba zadržava izvršenje izrečene mjere.

Ako u roku od 8 dana ovlaštena lica ne podnesu žalbu odluka Disciplinske komisije je konačna.

Drugostepeni organ je dužan da žalbu na oslobađajući ili osuđujuću odluku Disciplinske komisije, riješi u roku od trideset dana, od dana prijema žalbe. Potvrđivanjem, preinačivanjem ili ukidanjem prvostepene odluke.

Član 48.

Neblagovremeno podnijete žalbe podnijete od neovlaštenih lica se odbacuju.

Član 49.

Upravni odbor Karate saveza Kantona Sarajevo razmatra žalbu na taj način što se prethodno informiše o predmetu i toku postupka pred Disciplinskom komisijom, o sadržini objave odluke i razlozima prigovora a potom se raspravlja i odlučuje o njegovoj osnovanosti.

Podnosilac žalbe ima pravo prisustvovanja sjednici Upravnog odbora kao i drugi učesnik postupka koji se mora uredno obavjestiti o podnjetoj žalbi i vremenu održavanja sjednice Upravnog odbora na kojoj će ova biti razmatrana.

6. Postupak po žalbi na odluku drugostepenog organa

Član 50.

Odluka Upravnog odbora Karate saveza Kantona Sarajevo nije konačna samo ako je odlukom Upravnog odbora Karate saveza Kantona Sarajevo izrečena disciplinska mjera doživotna diskvalifikacija ili brisanje iz članstva Karate saveza Kantona Sarajevo.

Protiv ove Odluke pravo žalbe Konferenciji Karate saveza Kantona Sarajevo u roku od trideset dana od dana prijema iste, imaju lica protiv koga je izrečena disciplinska mjera doživotne diskvalifikacije i organizacije protiv koje je izrečena disciplinska mjera brisanje iz članstva.

Član 51.

Konferencija Karate saveza Kantona Sarajevo odluku po žalbi iz prethodnog Člana donosi većinom glasova svih delegata Konferencije Karate saveza Kantona Sarajevo, Odluka Konferencije Karate saveza Kantona Sarajevo za slučaj predviđen Članom 7 stav 3. Pravilnika je konačna.

C) PONAVLJANJE POSTUPKA

Član 52.

Postupak koji je završen konačnom odlukom disciplinskog organa Karate saveza Kantona Sarajevo može se ponoviti na prijedlog podnosioca zahtjeva kojim je pokrenut postupak ili lica odnosno organizacije protiv kojih je postupak vođen.

1. Ako je odluka zasnovana na lažnim dokaznim sredstvima,
2. Ako je podnosiocu zahtjeva za pokretanje disciplinskog postupka, licu, organu odnosno organizaciji protiv kojih je vođen postupak uskraćeno, protivno odredbama ovog Pravilnika, učesće u postupku,
3. Ako postoje činjenice i dokazi koji bi bili od presudnog uticaja na odluku, a koje subjekti koji mogu tražiti ponavljanje nisu znali u vrijeme donošenja odluke.

Prijedlog za ponavljanje postupka podnosi se Disciplinskoj komisiji Karate saveza Kantona Sarajevo u roku od četrdeset pet dana od dana saznanja za razloge ponavljanja.

Ako disciplinska komisija Karate saveza Kantona Sarajevo odbije prijedlog može se izjaviti žalba Upravnom odboru Karate saveza Kantona Sarajevo kao drugostepenom organu. Prijedlog za ponavljanje postupka ne zadržava izvršenje odluke.

ZASTARJELOST

a) Zastarjelost pokretanja postupka

Član 53.

Disciplinski postupak se ne može pokrenuti po isteku roka od godinu dana od dana izvršenja prekršaja, odnosno saznanja za prekršaj.

Zastarjelost se prekida podnošenjem zahtjeva za pokretanje disciplinskog postupka ili aktom Disciplinske komisije.

b) Zastarjelost izvršenja odluke

Član 54.

Izrečena mjera disciplinskog organa može se izvršiti u roku od godinu dana od dana kada je postala izvršena. Po isteku ovog roka izrečena mjera disciplinskog organa se ne može izvršiti.

IZVRŠNOST I KONAČNOST DONIJETE ODLUKE

a) Izvršnost

Član 55.

Odluka disciplinskog organa Karate saveza Kantona Sarajevo izvršna je danom konačnosti iste.

b) Konačnost

Član 56.

Ako u propisanom roku ne bude podnijeta žalba na odluku prvostepenog disciplinskog organa Karate saveza Kantona Sarajevo ista je konačna danom isteka roka u kome je žalba mogla biti podnijeta.

PRELAZNE I ZAVRŠNE ODREDBE

Član 57.

Stupanjem na snagu ovog Pravilnika prestaju da važe odredbe opštih akata koje se odnose na rad disciplinskih organa Karate saveza Kantona Sarajevo.

Postupci koji se vode po ranije važećim i primjenjivanim odredbama opštih akata, okončat će se, stupanjem na snagu ovog Pravilnika, po odredbama ovog Pravilnika.

Član 58.

Disciplinski postupci koji se pokreću u okviru rada udruženih organizacija KS BiH vodit će se po odredbama ovog Pravilnika, dok udružena organizacija, čiji disciplinski organi vode disciplinski postupak, ne usaglasi svoja opšta akta, koja se odnose na ovu materiju, sa odredbama ovog Pravilnika.

Član 59.

Autentična tumačenja odredaba ovog Pravilnika daje Upravni odbor Karate saveza Kantona Sarajevo.

Član 60.

Izmjene i dopune ovog Pravilnika vrše se na način i po postupku za njegovo donošenje.

Član 61.

Ovaj pravilnik stupa na snagu osam dana od dana donošenja.

Napomena: Ovaj pravilnik je usaglašen sa Disciplinskim pravilnikom Karate saveza BiH.

DISCIPLINSKA KOMISIJA
Vahid Selimbegović